

SASTRI COLLEGE
ISIKHUNGO SEZILIMI
ISIZULU ULIMI LOKUQALA LOKWENGEZA
IBANGA LESHUMINANYE - 2020 | |
ITHASKHI YESITHATHU

UMHLELI : N.E. BHENGU

ISIKHATHI: IHORA ELILODWA

UMCUBUNGULI: Z. NZAMA

IMIKLOMELO: 40

IMIYALELO KUBAFUNDI

1. Leli phepha lineziqephu ezi-3
 - ISIQEPHU A = **Isifundo sokuqondisisa** (20)
 - ISIQEPHU B = **Ukufingqa** (10)
 - ISIQEPHU C = **Uhlelo lolimi nokusetshenziswa kwalo** (10)
2. Linamakhasi ayi**SITHUPHA**
3. Phendula yonke imibuzo.
4. **Qala isiqephu** ngasinye ekhasini laso sodwa
5. Sebenzisa izinombolo **njengoba zibhaliwe.**
6. Qikelela upelomagama
7. Phendula **ngolimi ohlolwa ngalo.**
8. Bhala ngobunono nangesandla esifundekayo.

ISIQEPHU A: ISIVIVINYO SOKUQONDISISA

UMBUZO 1

1.1 Fundisisa le ndatshana engezansi, bese uphendula imibuzo ezolandela.

Ngaso sonke isikhathi uma uHulumeni ememezela izinhlelo ezizodla izizumbulu zezimali, uyaye aqhakambise ukuthi kuzoba namathuba emisebenzi amaningi kakhulu. Ngenxa yokuthi lezi zethembiso zize zisakazwe nasemithonjeni yezindaba ethanyelwa yizinkumbi zabantu abantula le misebenzi, amathemba aba makhulu okuthi ikati lizoxosheka eziko.

Kube isimo esifuze lesi kule minyakana edlule ngesikhathi leli zwe lethu ligidlabezwa ngu-FIFA ngelungelo lokuhlela imidlalo yebhola yeNdebe yoMhlaba yezi-2010. Imibiko eyayithi kuzokwakhiwa izinkundla ezintsha zebhola ezizodla izigidigidi zamarandi cishe kuzo zonke izifundazwe zakuleli yaletsha amathemba okwanda kwamathuba amaningi emisebenzi. Nembala kumanje nje uyasha lo msebenzi, futhi eziningi zalezi zinkundla seziyaqala ukucaca ukuthi zizokuma kanjani uma seziphothuliwe.

Ezinye izindawo ezisezinhlweni zokulungiswa kabusha kumbe ziqalwe phansi, yizikhumulo zezindiza. Kumanje nje ubuphekupheku esikhumulweni esikhulukazi sakuleli, i-OR Tambo International Airport, eGoli. Lesi sikhumulo siyanwetshwa, ngayo belu inhloso yokubhekana nezinkumbi zabalandeli bebhola ezizothleka kuleli ngowezi-2010 ziphuma kuwo wonke amagumbi omhlaba. Ngikhuluma nje nokwakhiwa kwesikhumulo okudala kukhulunywa ngaso i-King Shaka International Airport, enyakatho neTheku, sekuqaliwe. Ogandaganda behla benyuka kuleli shashalazi belihlelemba. Ziningi nezinye izinto ezisezinhlweni zokwakhiwa nokuvuselelwa. Lapha kubalwa amahhotela amasha, okwethenjwa ukuthi kuyothi kufika unyaka wezi-2010 ebe esekulungele ukwamukela izinkulungwane zezivakashi.

Kukho konke lokhu, okuthanda ukujabhisa kakhulu yilezi ziqubu zeziteleka ezilokhu zizwakala lapha nalaphaya. Cishe sekuze kwaba kabili kubikwa ukuthi ukwakhiwa kwenkundla yaseKapa, i-Greepoint Stadium kume nse. Phela izisebenzi zenkontileka eyakha le nkundlakazi zisuke sezibeke phansi amathuluzi ngoba zinezikhalo ngezimali nangokunye. Zolo lokhu kubikwe okufanayo eThekwini njengoba kuzwakale ukuthi izisebenzi ezakha inkundla i-Moses Mabida nazo seziqome ukubeka amathuluzi phansi ngenxa yesikhalo sazo njalo izimali nangezinye izimo zokusebenza. Kungenzeka ukuthi lezi ziteleka ngeke zibe nemiphumela emibi yokubambezeleka ukwakhiwa kwalezi zinkundla okuyinto engaholela ekubeni zingaphothulwa ngezikhathi ezizinqunyelwe.

Ikhasi le-3 kwayi-6

1.1.1 Nikeza incazelo yala magama alandelayo:

- (a) Izinkumbi zabantu (1)
- (b) Isikhumulo sezindiza (1)

1.1.2 Zitholakala kumaphi amadolobha lezi zikhumulo zezindiza ezilandelayo:

- (a) O R Tambo International Airport. (1)
- (b) King Shaka Airport. (1)

1.1.3 Bhala igama lenhlangano elisetshenziswe esiqeshini eyengamele ibhola emhlabeni jikelele. (1)

1.1.4 Ukuteleka kwezisebenzi kunomthelela muni ekwakhiweni kwezinkundla zebhola? (2)

1.1.5 Chaza lezi zimo zokukhuluma njengoba zisetshenziswe endabeni:

- (a) Uyasha lo msebenzi
- (b) Ukubeka amathuluzi phansi

1.1.6 Ngokubona kwakho yikuphi okunye okungaba yimbangela yokuteleka kwezisebenzi? (2)

1.1.7 Yiqiniso noma umbono ukuthi bonke abantu bakuleli zwe bazozuza ngonyaka wezi-2010? Sekela impendulo yakho. (2)

1.1.8 Izinhlelo zikaHulumeni zokwakhiwa kwezikhumulo nezinkundla kungezinye zezindlela eziveza amathuba emisebenzi. Uyavuma noma uyaphika? Sekela. (2)

Pheqa ikhasi

1.2 Bukisisa lo mfanekiso olandelayo, bese uphendula imibuzo ezolandela.



- 1.2.1 Ucabanga ukuthi ugogo ulaliswe yini? Bhala OKUKODWA. (1)
- 1.2.2 Ngabe lo gogo udayisa ezikoleni zamabanga angakanani? Sekela ngegama ELILODWA elisesithombeni. (2)
- 1.2.3 'Yalala intombi endala.' Yimuphi umuzwa ovezwa yila mazwi. (1)
- 1.2.4 Ngabe uyavuma noma uyaphika ukuthi ugogo uthanda imfashini? Sekela impendulo yakho. (1)
- 1.2.5 Ngokomndeni, ugogo uzala bani? (1)
- 1.2.6 Yikuphi lokhu kuganga kopikinini okuqondwe kulesi sithombe? (1)

AMAMAKI ALESI SIQEPHU: 20

Pheqa ikhasi

ISIQEPHU B: UKUFINGQA

UMBUZO 2

Fundisisa lesi siqeshana ngokucophelela, bese uyasifingqa ngamagama akho angama-50 kuya kwangama-60, ngamaphuzu ayiSIKHOMBISA. Sebenzisa izinombolo 1-7.

Kuningi okuguquka sikubona. Kuningi futhi okusafanele kuguquke kuye phambili. Kwezokuhlalisana kugcizelelwa ukuthi noma uguquko, lwenzeka njalo, kufanele isiko nosikompilo lwethu kungaguquki masinya. Yilokho okwenza kube nokuxhumana kwempilo, okunganqamuki. Uguquko olukhulu okubukeka kuyilo olwamukelekayo emphakathini wabaNsundu ukuthi izindawo zabadala seziyisiphephelo sabo.

Uma sikhuluma ngabadala kanye namakhaya abo, kufanele sibathathe ngenhlonipho kusukela olimini kuye kufike ezenzweni. Bheka nje khona lokhu ukuthi uma ukhuluma nomuntu omdala osegugile, ukhulume noma kanjani ungakhombisi inhlonipho. Ayiphathwa-ke eyokuthunywa ngoba izingane zivele zinqabe uma bezithuma. Mayelana nezinguquko, akukabi nsuku zatshwala lapho iningi lethu belivumelana ngokuthi ukusa abantu abadala kula makhaya akhiwa nguhulumeni noma ngomasipala, kufana nokubalahla. Abanye bebelimisa ngesihloko elokuthi yingoba bengathandwa futhi benganakekelwa. Manje sekuyabonakala ukuthi sekwasebenza wonke umuntu ekhaya. Kokunye kusala izingane ezisafuna umsebenzi kodwa ezingakufundanga noma ezingakuthandi ukunakekela abantu abadala ngisho abazali bazo imbala. Kuningi ukukhathazeka ahlangu nakho umuntu omdala ehlezi ekhaya. Ithuba elihle lokuthi abadala bazikhethetele ukuyohlala emakhaya abakhelwe wona. Kulesi sikhathi samanje ukuhola usekhaya kusho lokhu: ukuthathelwa imali yakho yizingane zakho ngenkani zize zikushaye; ukuncishwa ukudla okuthengwe ngemali yakho; ukuthathelwa imali ngenkani kuyokwenziwa izinwele, kuzulwe, kubuywe sekwazalwa izingane ezidinga ukondliwa ngayo le madlana yempesheni. Abanye banikezwa ukudla okubolile ngoba sekuphele khona. Imali yabo isuke isithathiwe yayokwenza okunye. Phezu kokuthi abadala bekhokhela abazukulu esikoleni uma abazali sebashona, noma bekhona kodwa kuyaqhubeka abantu abadala bahlukumezeke. Abanye abadala bahlukumezeka khona laphaya emholweni. Badayiselwa izinto ngenkani, bazithenge noma bengazifuni. Sengathi lezi ndawo zabadala zizogcina ziyisiphephelo kwabaningi. Okudingekayo ukuba lezi zindawo zibukeke, zigcineke nomphakathi ufake isandla noma kungavele lutho olubi.

AMAMAKI ALESI SIQEPHU: 10

Pheqa ikhasi

ISIQEPHU C: UHLELO NOKUSETSHENZISWA KOLIMI

UMBUZO 3

3.1 Funda lesi siqeshana bese uphendula imibuzo ezolandela.

Impilo ibalulekile. Kuyadingeka ukuthi uhlale uzinakekela ngaso sonke isikhathi. Abaziyo bayaye bathi uphila kanye kuphela. Kubalulekile ukunakekela impilo ngezindlela eziningi ezahlukene. Kuyadabukisa ukubona abantu besifazane besebenzisa yonke into abahlangana nayo egameni lokuthi banakekela imizimba yabo. Bakwenza lokhu ukuthokozisa abantu abahlekisana nabo. Okungena emzimbeni makuqashelwe impela ukuthi kuzoba namphumela muni, kungaba ukudla; iziphuzo kanye nezidakamizwa ezisemthethweni. Izidakamizwa ezisemthethweni kungaba yilezo ezitholakala ngencwadi kadokotela. Lezo ezingekho emthethweni, kungaba umthunzi wezinkukhu, 'amaphilisi' 'nomjovo' nokunye. Uma uthanda impilo uphinde uyinakekele, ungaphila isikhathi eside.

- 3.1.1 Kulesi siqephu , tomula amagama AMABILI angamabizonto. (2)
- 3.1.2 Egameni 'ABAHLEKISANA' khipha lokhu:
- (a) Isivumelwano sikamenziwa. (1)
 - (b) Umsuka. (1)
 - (c) Isijobelelo. (1)
- 3.1.3 Shono ukuthi imisho edwetshelwe kulesi siqephu iluhlobo luni. (2)
- 3.1.4 Uma uthanda impilo uphinde uyinakekele, ungaphila isikhathi eside.
- (a) Caphuna igama elichasisayo kulo musho ongenhla. (1)
 - (b) Phinda usho ukuthi igama olicaphunile liluhlobo luni lesichasiso. (1)
- 3.1.5 Bhala igama elilodwa elimqondofana naleli elithi 'umthunzi wezinkukhu'. (1)

AMAMAKI ALESI SIQEPHU : 10

AMAMAKI ESEWONKE : 40